



Odecatemorion Saturni in domo Martis, dat anxietates, & tristitias ac indigentiam. In domo Iouis, dat officium iudicis. In domo Lunæ, miseria & labores. In domo Solis, malum statum, & malos mores.

Dodecatemorion Martis cum Mercurio, & unus eorum commixtus ascendenti, uel habens testimonium in ascendente, significat quòd natus erit audax, & animosus.

Dodecatemorion Mercurij in domo Iouis, Mercurio habente in ascendente aliquam dignitatem, significat natum diligere iustitiam.

Dodecatemorion Veneris in domo Iouis lætitiā & castitatem significat. In domo Martis fornicationem, maxime si fuerit in angulo.

Dodecatemorion Iouis in domo Veneris, dat coitum cum mulieribus, moderatum tamen & legitimum.

Nunc de imaginibus cœli: Et primo de ijs quæ in Zodiaco sunt.



Arietis signum cum suis stellis, facit natum superbum, & suis consilijs confidentem, parui tamen ingenij, & simplicis animi, amatorem filiorum, suis bonis non contentum, inuerecundum, inhonestum, commensationibus & potationibus omnino deditum, precipitem, mutantem sæpius sedem, & qui soleat delectari etiam in ocio, lasciuus, uagus semper per orbem, ignotus, cupidusq; scrutari nouum semper pelagus.

Tauri uero signum, facit natos tacitæ mentis, & parui ingenij, sed si quando exitentur miranda faciunt, cupidos etiam uetera innouandi, amatores puellarum, libidinosos, & simplices, suos amores libenter celantes. Sed pars suæ constellationis in qua sunt pleiades, facit natum lasciuum & occupatum semper circa uoluptates, petulantem, temulentum, gulosum, & mordacem dictis, curam habentem corpora pingendi, poliendo pilos pumice, & tangere capillos, & diligere dicta probra factaq; & gaudet in ambitione audaciam fingendo. Sed pars illa in qua sunt stellæ Hyades, maxime clara Hyadum quæ dicitur Aldebaran, facit natum inquietum, & turbulentum, & seditione populari gaudentem, interdum fidum sed amantem bella propter pacem.

Geminorum autem signum, inclinât natum ad bonas artes, & facit eum musicæ studiosum boni ingenij, mutabilem, rationabilem, honestum.

Cancri signum facit natum amatorem commutationum, mercimoniarum, mobilem.

Leonis signum præsertim pars oris, facit natum crudelem, fortem rapacem, auarum & minacem, & cupidum uiuendi ex rapinis, & illas quandoq; retinere, quandoq; profundere, & adeo cupidum facit, ut nullo censu possit animum replere, gaudentem commensationibus, & gulosum. Sed stella eius regia quæ dicitur cor Leonis, natum facit imperij desiderio æstuarè, superbum & magnanimum.

Virginis astrum facit natum iustum, rationabilem, uerecundum, studiosum, colentem diuina, cupidum dare diuinas leges. Sed clara eius stella supra sinistram palmam stans, quæ Spica dicitur, inclinât natum ad amorem agriculturæ, & ad parandum ex ea alimenta, ac etiam magnarum artium cognitionem præbet, maxime si à Mercurio bene disposito respicitur.

Libræ signum cum suis stellis, facit natum iustum & omnia æquitate considerantem, & sibimet mortis causam inferentem, & credentem plurimum suæ imaginationi, studiosum in reperiendo bonas artes, bonum & rationabilem.

Scorpio